

# ZORAM TLUANA MIRIANGVAI 'THANGTEEKA'

**Buata Bawihlung**

Dt. 6<sup>th</sup> July, 2017

Thangteeka hi rualban lo, chhungkhat laina sawi tur pawh nei lo, ringvai a ni a. A nu leh pa hming takngial pawh a hre lo a. A pian kum erwh Thli chhe tleh kum tih an hria a ni awm e.

Amah hi Piangsual, Ke lek lam deuh a nih avangin a thatlai deuh pawhin kal pangngaiin a kal hlei thei lova. A kawng kal hi tlan deuh reuhin a petek euh euh thin a ni. Tum khat chu Aizawlah miin Pheikhawk an lo pe a, a Pheikhawk thar bun chuan Durtlang lamah a kal ta a, Durtlang a thlen chuan a Pheikhawk thar chu a chhip a pawp hman tawh a ni. Ratu lam tlangdung a zin tum pawhin, kawng lakah Sakei nen an in tawh hlauh mai a ni awm e. Sakei chu kawngsir kawrah a zuang lut ta daih a, Thangteeka hlau lutuk petek chuan Sakei zuan luhnaah tak a petek lut zui ve a ni awm a, chumi tum chuan a damlo zui deuh reng nghe nghe a, tun thlengin Thangteeka leh Sakei zuan thlakna tiin an la sawi thin. Chutianga ke dik lo chu a ni a, a lainatawm hle.



Chutianga a ni chung a kawng mumal lo leh fur khaw chhe tak tak karah pawh, khaw hrang hrang a tlawh kual reng tho a. Mi ten mak an ti hle thin a, Sapuiin a hruai thin a nihte an ring hial thin. Hmun thenkhatah chuan naupangten an lo chhaih nawmnah chang pawh a tam a, chutih rualin, amah lainata, duhsaktu pawh a tawng ve zel bawk. Phullen pawh a lo tlawh ve tawh thin a ni ngei ang Khawnbawl Upa Pu Hrangphunga, Pu Tlanhnuna pa te nen pawh an in hre tha hle a, tin Pu Khuanghnuna pi (a nu nu) Pi Tlingzovi te nen pawh an in hre hle a ni.

Chutianga khaw hrang hranga a awm kual hnu chuan Phullen chu nuam a ti hle a ni ang, Phullen a thih a, Phullen a lunghah a duh thu chu a sawi a. Chutia Thangteekan Phullena Lunghah a duh tih an hriat chuan, Phullen tlangval leh paho chuan Chhawrtui atangin Changzawl lamah kalpuin, Phullenah an zawn hawpui ta a. A pualin Lailak veng, Pu Hmingthanga In bulah a In tur an sak sak a. Tah chuan awm ve in, khawtlang mipuiten Buhfai leh a mamawh turte an khawn khawm sak a, eitur an in pek chhawk thin a. Chhawrtui khuua a awm laiin miin coat buang, fual lam deuh hi an lo pe a. Chu a coat dawn chu ama mamawh lei nan pawisa a chantir kha tha zawkin an hriatsak a, Hmunhlui veng a mi Pu Chawngkhuma (Pu Kaphlira pate) chuan Rs 20 (sawmnhni) laiin an lei chhawn sak ta a ni.

A pian dik tawh lo vang hian a zan mute hi thawh a harsat a. A upat deuh hnu pheh chuan kal a harsat zuala, tlangval hovin an riahpuh thin a ni. Vawikhat chu, Pu Ralzinga leh Pu Lalbuanga (Rammawii pasal) ten an riahpuh a. Zanah a zun a chhuak ta, a tho mai thei si lo, "Tlangval te u, ka zun a chhuak e" a ti a. A riahpuitute kha an lo mutui deuh a ni ang, an hre thei si lo. Kawmchhak pa Pu Awrchunga (Pu Hmingthanga pa) chuan a lo hria a, a zuk kai tho ta a ni awm e. Chutianga chuan khawtlang, thenawm khawveng nula tlangvalten an ngaihsak hle a ni.

Thangteeka hian Kohhran a belbul hle a. Kohhran mi tak a nih vangin Kohhran pawhin a ngaihsak em em a, chaw petu turte, riahpuh tur ruatte pawh Kohhran hian a ruahman vek thin a. Kohhran inkhawm a thulh ngai lo a, mahse a ke dik loh deuh vangin a kal tha thei vak lo va, a inkhawm turte hi tlangvalhoin an zak zeh a, an kalpui nawl nawl thin. Biak Inah hian Pulpit hnung lam deuhah chuan thutna chuam bik a nei a, a thlen tlai pawhin chulai chu a pan vang vang thin. Bible hi a kawh reng thin a, khawiah nge lehkha a zir hriat a ni lo va, Bible a chhiar thiam a, mahse a Bible chhiar crawh a awmzia hriat fiah hleih theih a ni lo.

Chutianga hun a hman hnu chuan, kum 1947 October ni 23, Nilaitawhtan khan chatuan ram a pan ta a. A thlan hi Phullen hmunhlui thlanmualah, tuna Bung lianpuh dinna chhak lawk, Zangchhiaa (Lalbeli pa) thlan bulah an laih sak a. Thangteeka thih ni hian, mak tak maiin, khua a chhe nasa hle a, Thli a tleh hum hum a, nasa taka ruah surin, khua a cheng a, a hrehawm hle a ni awm e. Tlangval thlanlai tan pawh Thlan khur pawna awm kha a

## ZORAM TLUANA MIRIANGVAI 'THANGTEEKA'

hrehawmin taimak leh tlawmngaihna zawkah ngaih hial khawpin khua a chhia a ni. He a thih ni a thli tleh hi Tualbung velah a na zual a, Kawlthei hnah leh thing hnah dangte, phaitual hnim chenin a chhem fi thulh nghe nghe.

Thangteeka ruang hi Phullen hmunhlui thlanmualah zah taka phum a nih hnuah, Phullen tlangval leh pahote chuan Thangteeka pual hian Lungdawh tha tak siam sak an tum ta zel a. Nula leh tlangval ten Thangteeka lungdawh tur chu Hmunhlui lam Khiangkarkah thlen hma Tuitai mawng ami an la a. Lungdawh tur an lak ni chuan mi thahnem tak an thawkchhuaka, phur tak leh hlim takin, haw haw hulh hulh chungin Thangteeka Lung chu an zawn haw a ni. A lungdawha thu ziaak dah tur pawh tha tak a siam an duh zel a. Upa Zalawra (Sande Sikul lama mi lar tak) Mission veng chu an dawr a, ani chuan “*in duh angin a thu rawn ziaak ula, phaiah ka lo thawn ang e*” alo ti a. Phullen YMA chuan Lungdawh a ziaak tur thu chu Pu Zalawra an thawn a, ani khan tawifel leh kimchang tur siin a lo siam danglam hret a. Tichuan Culcutta-ah a thawn ta a, a thu ziaak chu thir phekah reh thei lo turin thil var phum hmangin tha takin ziah a ni ta a ni.

Tichuan a thih atanga kum khat hnu, kum 1948 khan Phullen YMA chuan nalh leh mawi takin, Phullen Kawn atanga Aizawl lam panna kawngpui kam, hnai teeth chuan Thangteeka Hriatrengna Lungdawh tha tak chu an siam ta a. He lungdawh hi lal Awksarala thlan tih lohah chuan a hun laia Phullen lungdawh tha ber leh mawi bera chhal theih a ni ang. Thangteeka Lungdawhah chuan a hnuah thu ang hian ziah a ni a, a laiah Kros lem mawi tak ziah lan a ni bawh –

**ZORAM TLUANA MI RIANGVAI  
THANGTEEKA  
KUM 76, THIH NI : 23.10.'47**

**Kuta sak loh chatuan In chu  
A tan buatsaih a ni.**

**LUNG PHUNSAKTU:-  
PHULLEN  
YOUNG MIZO ASSOCIATION  
(Y.M.A 1948)**

Khaw hlui atangin khaw hnuai lam, motor kawngpui kal awlsamna lamah khua chu insawn hret hret a nih takah khan khaw hlui chu daipawn ramngaw a lo ni ta a. Chutiang a nih tak avang chuan Thangteek Lungdawh pawh chu Motor kawngpui kam Serzawl-Kawn, tuna YMA Ram an tih takah sawn a ni ve ta a ni. (*Thangteeka Lungdawh sawn a ni hi ka ui tak zet, mahse Thangteeka hmangaihna vang a ni zel tih erawh a chianga, a sawntute erawh ka dem lem lo– Buata*)

Thangteeka pian kum hi Thlichhe tleh kum tih a ni a. Thlichhe tleh kum chu 1876 niin mithiam leh thil hre zawkten an sawi a. Hetihlai hian, a Lungdawhah chuan kum 76 mi niin ni 23.10.1947 ah a thi tih ziah a ni a. Thlichhe tleh kum a piang, kum 1947-a thi a nih si chuan kum 72 mi ni awm tak a ni. Lungdawh phuntu Phullen Branch YMA te hian Thlichhe tleh kum hi an hai nge ni anga, a kum zat hi an chhut sual palh zawk tih chu hriat mai a harsa deuh.

Contact: 9862035204 & [buata.tkt@gmail.com](mailto:buata.tkt@gmail.com)

\*\*\*\*\*